



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

15.01.2021թ.

**Ո Ր Ո Շ ՈՒ Մ**  
**ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ**  
**ՔՆՆՈՂ ԱՆՁԻ**  
**թիվ ԳԲՔԱ-ԼՕ-2020/128**

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի  
Քարտուղարությամբ՝ Լ. Անանիկյանի

Պատվիրատու՝ «Ինֆեկցիոն հիվանդությունների ազգային կենտրոն» ՓԲԸ  
Բողոք բերող՝ «Մարգ Ֆարմացիա» ՍՊԸ

Գնման ընթացակարգի ծածկագիրը և առարկան՝  
«ԻՀԱԿ-ՀՄԱԱՊՁԲ-ԳԼԲՍ-20/15» ծածկագրով մեկ անձից գնում կատարելու  
ընթացակարգ, էնդոսկոպ համակարգի ձեռքբերում

ՀՀ գնումների հետ կապված բողոքներ քննող անձը (այսուհետ նաև՝ Բողոքներ  
քննող անձ)՝ քննության առնելով «Մարգ Ֆարմացիա» ՍՊԸ-ի (այսուհետ նաև՝  
Ընկերություն) կողմից 22.12.2020թ.-ին ներկայացրած բողոքը (այսուհետ նաև՝ Բողոք) և կից  
փաստաթղթերը,

**Պ Ա Ր Զ Ե Ց**

**1. Գործի նախապատմությունը**

Դիմելով ՀՀ գնումների հետ կապված բողոքներ քննող անձին՝ Ընկերությունը ներկայացրած բողոքով խնդրել է՝ պարտավորեցնել պատվիրատուին չեղյալ հայտարարել «ԻՀԱԿ-ՀՄԱԱՊՁԲ-ԳԼԲՍ-20/15» ծածկագրով գնանշման հարցման հրավերը:

Բողոքներ քննող անձին բողոքը մակագրվել է 18.12.2020թ.-ին:

Բողոքներ քննող անձի 21.12.2020թ.-ի թիվ /ԲԲԱ-ԼՕ/1/19135-2020 գրությամբ բողոքը վերադարձվել է՝ բողոքում առկա թերությունները վերացնելու համար:

Ընկերությունը 22.12.2020թ.-ին ներկայացրել է բողոքի շտկված տարբերակը, որը նույն օրը մակագրվել է Բողոքներ քննող անձին:

23.12.2020թ.-ին [www.gnumner.am](http://www.gnumner.am) կայքում հրապարակված հայտարարությամբ ներկայացված բողոքը ընդունվել է վարույթ, տրվել է թիվ ԳԲԲԱ-ԼՕ-2020/128 համարի ծածկագիրը:

29.12.2020թ.-ին և 15.01.2021թ.-ին նշանակվել և հրավիրվել են նիստեր:

Գործի քննությունն ավարտվել է 29.12.2020թ.-ին և Բողոքներ քննող անձի որոշման հրապարակման օր է նշանակվել 15.01.2021թ.-ին:

## **2. «Մարզ Ֆարմացիա» ՍՊԸ-ի ներկայացրած փաստերը, հիմնավորումները և պահանջը.**

«Մարզ Ֆարմացիա» ՍՊԸ-ն 22.12.2020թ.-ին ներկայացրած բողոքով հայտնել է հետևյալը.

*«Սույն թվականի դեկտեմբերի 17-ին ԻՆՖԵԿՑԻՈՆ ՀԻՎԱՆԴՈՒԹՅՈՒՆՆԵՐԻ ԱԶԳԱՅԻՆ ԿԵՆՏՐՈՆ ՓԲԸ-ի կողմից էլեկտրոնային գնումների Armeps ([www.armeps.am](http://www.armeps.am)) համակարգի միջոցով հրապարակվել է ԻՀԱԿ-ՀՄԱԱՊՁԲ-ԳԼԲՍ-20/15 ծածկագրով գնանշման հարցման հրավեր:*

*Հրավերով սահմանվում է, որ այն կազմվել է գնումների մասին ՀՀ օրենսդրության, այդ թվում՝ «Գնումների մասին» ՀՀ օրենքի (այսուհետ՝ Օրենք), ՀՀ կառավարության 2017թ. մայիսի 4-ի N 526-Ն որոշմամբ հաստատված «Գնումների գործընթացի կազմակերպման» կարգի (այսուհետ՝ Կարգ), ՀՀ կառավարության 2017 թվականի ապրիլի 6-ի N 386-Ն որոշմամբ հաստատված «էլեկտրոնային ձևով գնումների կատարման» կարգի և այլ իրավական ակտերի պահանջներին համապատասխան և նպատակ ունի «ԻՆՖԵԿՑԻՈՆ ՀԻՎԱՆԴՈՒԹՅՈՒՆՆԵՐԻ ԱԶԳԱՅԻՆ ԿԵՆՏՐՈՆ» ՓԲԸ-ի (այսուհետ՝ պատվիրատու) կողմից հայտարարված ընթացակարգին մասնակցելու մտադրություն ունեցող անձանց (այսուհետ՝ մասնակից) տեղեկացնելու ընթացակարգի պայմանների՝ գնման առարկայի,*

ընթացակարգի անցկացման, ընտրված մասնակցին որոշելու և նրա հետ պայմանագիր կնքելու մասին, ինչպես նաև օժանդակելու ընթացակարգի հայտը պատրաստելիս:

Հայտեր կարող են ներկայացնել համակարգում գրանցված բոլոր անձիք, անկախ նրանց՝ օտարերկրյա ֆիզիկական անձ, կազմակերպություն, քաղաքացիություն չունեցող անձ լինելու հանգամանքից:

Ըստ ՀՀ Կառավարության 526-Ն որոշման՝

16. Գնման գործընթաց սկսելու համար գնման առարկան պետք է ներառված լինի գնումների պլանում: Գնման պահանջի ծագման օրը պետական գաղտնիք չպարունակող գնումների դեպքում հաստատված կամ փոփոխված գնումների պլանի հրապարակման օրն է, իսկ պետական գաղտնիք պարունակող գնումների դեպքում՝ գնումների պլանի հաստատման կամ փոփոխման օրն է: Եթե տվյալ տարվա ընթացքում գնումների սկզբնական պլանում չներառված, լրացուցիչ գնումը կատարելու համար նախատեսվում են ֆինանսական միջոցներ, ապա գնումների պլանում կատարվում է լրացում:

17. Գնման գործընթացի կազմակերպման իրավական հիմքը սահմանված պահանջներին համապատասխան հաստատված, իսկ Գնումների մասին Հայաստանի Հանրապետության օրենսդրությամբ նախատեսված դեպքերում՝ նաև հրապարակված, գնումների պլանի առկայությունն է:

Սրանից բացի, նույն որոշմամբ ամրագրված է, որ

20. Գնման գործընթացի ընթացակարգի կազմակերպման նպատակով գնման պահանջի ծագման օրվան հաջորդող հինգ աշխատանքային օրվա ընթացքում գրավոր սահմանվում են՝

1) պատրաստանապու ստորաբաժանում, և

2) գնումները համակարգող:

Ինչպես ամրագրված է նույն որոշման մեկ այլ կետով,

11. Պատրաստանապու ստորաբաժանումը՝

1) կազմում և հաստատում է գնման հայտը.

Պատվիրատուի 2020թ. Գնումների պլանի հերթական ու ամենավերջին փոփոխությունը հրապարակվել է սույն թվականի դեկտեմբերի 17-ին, ժ. 19:22:32-ին (կից՝ [gnumner.am](http://gnumner.am) կայքի համապատասխան էջը), իսկ մրցույթը հրապարակվել է նույն օրը, սակայն 19 ժամ ավելի շուտ, այսինքն 17.12.2020թ. ժ. 00:24-ին (կից [armeps.am](http://armeps.am) կայքի համապատասխան էջը):

Այսինքն, ստացվում է, որ գնման պահանջի ծագման օրվանը հաջորդող օրը, ամենաշուտը, կարող է որոշվել պատրաստանապու ստորաբաժանումը, որը պիտի

պատրաստի գնման հայտը, այնուհետև միայն կարող է ձևավորվել գնահատող հանձնաժողովը և հրապարակվել մրցույթը: Այնինչ, գնանշման հարցման մասին հայտարարության մեջ նշվում է, որ «հայտարարության սույն տեքստը հաստատված է գնահատող հանձնաժողովի 2020 թվականի «դեկտեմբերի» «16» «1» որոշմամբ», այսինքն, փաստացի, գնահատող հանձնաժողովը ձևավորվել և նույնիսկ հասցրել է գնման առարկայի մրցույթի հրավերի ու հայտարարության վերաբերյալ նիստ անցկացնել մինչև գնման առարկայի գնումների պլանում ներառված լինելու փոփոխությունը հրապարակելը: Սա ուղղակիորեն հակասում է գնման գործընթացի կազմակերպման իրավական դրույթներին:

Վերոնշյալ իրավական հիմքերից բացի, հրավերում կա ևս մեկ սխալ, այն է՝ ընտրված ընթացակարգը, ըստ armeps.am-ի և ըստ գնումների պլանի «հրատարակված անձից գնում» ընթացակարգն է, այն դեպքում, երբ ամբողջ հրավերի տեքստը կազմված է որպես «գնանշման հարցում», սակայն պահպանված չեն գնանշման հարցման հրավերի համար օրենքով սահմանված ժամկետները (հայտերի բացում և այլն): Այսպիսով, հրավերի տեքստից անհասկանալի է, ի վերջո որ ընթացակարգով է անցկացվելու մրցույթը:»:

Ելնելով վերոգրյալից, «Մարգ Ֆարմացիա» ՍՊԸ-ն Բողոքներ քննող անձին խնդրել է՝ պարտավորեցնել պատվիրատուին չեղյալ հայտարարել «ԻՀԱԿ-ՀՄԱԱՊԶԲ-ԳԼԲՍ-20/15» ծածկագրով գնանշման հարցման հրավերը:

### **3. «Ինֆեկցիոն հիվանդությունների ազգային կենտրոն» ՓԲԸ-ի կողմից բողոքի վերաբերյալ ներկայացված փաստարկները, հիմնավորումները և դիրքորոշումը.**

Բողոքներ քննող անձը 23.12.2020թ.-ին թիվ /ԲԲԱ-ԼՕ/2/19382-2020 գրությամբ դիմել է «Ինֆեկցիոն հիվանդությունների ազգային կենտրոն» ՓԲԸ-ին (այսուհետ նաև՝ Պատվիրատու), հնարավորություն տալով «Մարգ Ֆարմացիա» ՍՊԸ-ի կողմից 22.12.2020թ.-ին ներկայացված բողոքի վերաբերյալ ներկայացնել անհրաժեշտ բոլոր փաստաթղթերի պատճեններն ու Պատվիրատուի գրավոր կարծիքը:

Պատվիրատուն ստանալով գրավոր դիրքորոշում հայտնելու վերաբերյալ գրությունը, ինչպես նաև ծանուցված լինելով նիստերի տեղի, օրվա և ժամի մասին, ներկայացել է հրավիրված նիստերին՝ չներկայացնելով գրավոր դիրքորոշում:

Պատվիրատուի ներկայացուցիչները բողոքի քննության ընթացքում չներկայացրեցին Պատվիրատուի ղեկավարի կողմից հաստատված պատշաճ լիազորագիր:

**4. ԳԲՔԱ-ԼՕ-2020/128 բողոքի քննության համար էական նշանակություն ունեցող փաստերը.**

Սույն գործի քննության համար էական նշանակություն ունեցող փաստերի համաձայն՝

i. «Ինֆեկցիոն հիվանդությունների ազգային կենտրոն» ՓԲԸ-ի (այսուհետ նաև՝ Պատվիրատու) կողմից էնդոսկոպ համակարգի ձեռքբերման նպատակով 16.12.2020թ.-ին հայտարարվել է «ԻՀԱԿ-ՀՄԱԱՊՁԲ-ԳԼԲՍ-20/15» ծածկագրով մեկ անձից գնում կատարելու ընթացակարգ (այսուհետ նաև՝ Ընթացակարգ):

ii. Ընթացակարգը հաստատվել է գնահատող հանձնաժողովի 16.12.2020թ.-ի թիվ 1 որոշմամբ, իսկ հայտերի բացման նիստի օր է սահմանվել 19.12.2020թ.-ին ժամը 13:00-ն ներառյալ:

iii. Ընթացակարգի հրավերի թիվ 1 հավելվածով նախատեսված տեխնիկական բնութագիր-գնման ժամանակացույցի համաձայն՝ 1-ին չափաբաժնի մասով գնման առարկա է հանդիսանում 1 հատ էնդոսկոպ համակարգի կոմպլեկտ /վիդեոգաստրոկոլոնոսկոպիկ համակարգի կոմպլեկտ/ սարքը, գումարը նշված է՝ 0 և որպես գնումների պլանով նախատեսված միջանցիկ ծածկագիր՝ ԳՄԱ դասակարգման (CPV) կոդ նշվել է՝ 33141174:

iv. [www.armeps.am/PPCM/](http://www.armeps.am/PPCM/) կայքում առկա «Ինֆեկցիոն հիվանդությունների ազգային կենտրոն» ՓԲԸ-ի 23.11.2020թ.-ին կատարված 2020 թվականի գնումների պլանի փոփոխության համաձայն՝ Ընթացակարգի 1-ին չափաբաժնով սահմանված ԳՄԱ դասակարգման (CPV) կոդով (33141174/501, 33141174/502, 33141174/503) ապրանքի համար նախատեսված քանակը նշվել է՝ 0, գումարը՝ 0:

v. [www.gnumner.am](http://www.gnumner.am) կայքում առկա տվյալների համաձայն՝ «Ինֆեկցիոն հիվանդությունների ազգային կենտրոն» ՓԲԸ-ի կողմից «ԻՀԱԿ-ՀՄԱԱՊՁԲ-ԳԼԲՍ-20/15» ծածկագրով հայտարարված մեկ անձից գնում կատարելու ընթացակարգով ձեռքբերվելիք գնման առարկան, սահմանված ԳՄԱ դասակարգման (CPV) կոդով, ներառվել է 2020թ.-ի գնումների պլանում:

vi. Գնումների պլանի համաձայն՝ գնման առարկա է հանդիսանում 1 հատ էնդոսկոպ համակարգի կոմպլեկտ /վիդեոգաստրոկոլոնոսկոպիկ համակարգի կոմպլեկտ/ սարքը, գումարը նշված է՝ 0 և որպես գնումների պլանով նախատեսված միջանցիկ ծածկագիր՝ ԳՄԱ դասակարգման (CPV) կոդ նշվել է 33141174:

vii. Գնումների պլանը Պատվիրատուի կողմից հաստատվել է 14.12.2020թ.-ին և հրապարկվել կայքում 17.12.2020թ.-ին:

## **5. Բողոքներ քննող անձի հիմնավորումները և եզրահանգումը.**

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակացության, որ «Մարզ Ֆարմացիա» ՍՊԸ-ի կողմից 22.12.2020թ.-ին ներկայացված բողոքն անհիմն է և ենթակա է մերժման, հետևյալ պատճառաբանությամբ.

«Գնումների մասին» ՀՀ օրենքի (այսուհետ նաև՝ Օրենք) 3-րդ հոդվածի 2-րդ մասի 1-ին և 2-րդ կետերի համաձայն՝ գնումների գործընթացը հիմնվում է հետևյալ սկզբունքների վրա.

1) գնման գործընթացի միասնական կանոններով մրցակցային, թափանցիկ, համաչափ, հրապարակային և ոչ խտրական հիմունքներով կազմակերպում.

2) պայմանագրի կնքման նպատակով մասնակիցների շրջանակի ընդլայնում և նրանց միջև մրցակցության խրախուսում:

Օրենքի 7-րդ հոդվածի 1-ին մասի համաձայն՝ ցանկացած անձ, անկախ նրա օտարերկրյա ֆիզիկական անձ, կազմակերպություն կամ քաղաքացիություն չունեցող անձ լինելու հանգամանքից, ունի գնման գործընթացին մասնակցելու հավասար իրավունք:

Վերոնշյալ իրավական նորմերի վերլուծության արդյունքում, Բողոքներ քննող անձը, փաստում է, որ գնումների օրենսդրությունը, հիմնվելով գնման գործընթացի մրցակցային, թափանցիկ, համաչափ, հրապարակային, ոչ խտրական, գնման գործընթացին մասնակցելու իրավահավասարության սկզբունքների վրա, նպատակ է հետապնդում ապահովելու գնումների գործընթացում հատուցման դիմաց պատվիրատուին վերապահված լիազորությունների կատարման համար անհրաժեշտ՝ կարիքին համապատասխան ապրանքների, աշխատանքների և ծառայությունների ձեռքբերումը՝ համարժեք հատուցմամբ, և որ ամենակարևորն է՝ գնումների գործընթացի տնտեսող, արդյունավետ և օգտավետ իրականացման ապահովումը:

Ինչպես նաև, Բողոքներ քննող անձը հարկ է համարում հավելել, որ վերոնշյալ սկզբունքների ապահովումն ու իրականացումը գնումների օրենսդրության շրջանակներում իրացնելու համար, անհրաժեշտ պայման է նաև ցանկացած անձի՝ գնման գործընթացին մասնակցելու հավասար իրավունք ունենալու սկզբունքը՝ անկախ նրա օտարերկրյա

Ֆիզիկական անձ, կազմակերպություն կամ քաղաքացիություն չունեցող անձ լինելու հանգամանքից:

Օրենքի 2-րդ հոդվածի 1-ին մասի 23-րդ ենթակետի (օրենքում օգտագործվող հիմնական հասկացությունները) համաձայն՝ գնման գործընթաց՝ գնում կատարելու նպատակով գնումների մասին Հայաստանի Հանրապետության օրենսդրությամբ նախատեսված ընթացակարգերի, իրավունքների և պարտականությունների իրագործմանն ուղղված գործողությունների ամբողջություն, ներառյալ՝ գնումների պլանավորումը, գնման առարկայի բնութագրի հաստատումը, պայմանագրի կատարումը և կառավարումը:

Օրենքի 15-րդ հոդվածի 3-րդ մասի համաձայն՝ գնումների պլանը, ներառյալ՝ փոփոխությունները, հաստատվելուն հաջորդող երկու աշխատանքային օրվա ընթացքում պատվիրատուն հրապարակում է տեղեկագրում, բացառությամբ պետական գաղտնիք պարունակող գնումների պլանի:

ՀՀ կառավարության 04.05.2017թ.-ի թիվ 526-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 4-րդ կետի համաձայն՝ գնման գործընթացը հետևյալ գործընթացների (գործառույթների) ամբողջությունն է՝

- 1) գնումների պլանավորում,
- 2) գնման գործընթացի կազմակերպում (ներառյալ գնման առարկայի բնութագրերի հաստատումը),
- 3) պայմանագրի կնքում,
- 4) պայմանագրի կատարում և կառավարում:

Կարգի 16-րդ կետի համաձայն՝ գնման գործընթաց սկսելու համար գնման առարկան պետք է ներառված լինի գնումների պլանում: Գնման պահանջի ծագման օրը պետական գաղտնիք չպարունակող գնումների դեպքում հաստատված կամ փոփոխված գնումների պլանի հրապարակման օրն է, իսկ պետական գաղտնիք պարունակող գնումների դեպքում՝ գնումների պլանի հաստատման կամ փոփոխման օրն է: Եթե տվյալ տարվա ընթացքում գնումների սկզբնական պլանում չներառված, լրացուցիչ գնումը կատարելու համար նախատեսվում են ֆինանսական միջոցներ, ապա գնումների պլանում կատարվում է լրացում:

Կարգի 17-րդ կետի համաձայն՝ գնման գործընթացի կազմակերպման իրավական հիմքը սահմանված պահանջներին համապատասխան հաստատված, իսկ Գնումների մասին Հայաստանի Հանրապետության օրենսդրությամբ նախատեսված դեպքերում՝ նաև հրապարակված, գնումների պլանի առկայությունն է:

Վերոնշյալ նորմատիվ իրավական ակտերի դրույթների համակարգված վերլուծության արդյունքում, Բողոքներ քննող անձը գալիս է այն եզրահանգման, որ գնման գործընթացը, Օրենքի իմաստով, գնում կատարելու նպատակով գնումների մասին Հայաստանի Հանրապետության օրենսդրությամբ նախատեսված ընթացակարգերի, իրավունքների և պարտականությունների իրագործմանն ուղղված գործողությունների ամբողջություն է, ներառյալ՝ գնումների պլանավորումը, գնման առարկայի բնութագրի հաստատումը, պայմանագրի կատարումը և կառավարումը: Իսկ արդեն Կարգով ՀՀ կառավարությունը սահմանել է, որ՝ գնման պահանջի ծագման օրը պետական գաղտնիք չպարունակող գնումների դեպքում հաստատված կամ փոփոխված գնումների պլանի հրապարակման օրն է, իսկ պետական գաղտնիք պարունակող գնումների դեպքում՝ գնումների պլանի հաստատման կամ փոփոխման օրն է և գնման գործընթաց սկսելու համար գնման առարկան պետք է ներառված լինի գնումների պլանում, անփոփելով, նշել, որ գնման գործընթացի կազմակերպման իրավական հիմքը սահմանված պահանջներին համապատասխան հաստատված, իսկ Գնումների մասին Հայաստանի Հանրապետության օրենսդրությամբ նախատեսված դեպքերում՝ նաև հրապարակված, գնումների պլանի առկայությունն է:

Այսինքն՝ գնման գործընթաց սկսելու համար անհրաժեշտ է որպեսզի գնման առարկան ներառված լինի գնումների պլանում, համապատասխան ստորաբաժանման կողմից հաստատվի և գնումների համակարգողին ներկայացվի գնման հայտ, ձևավորվի հանձնաժողով, որը հաստատում է հրավերը և հրապարակում պաշտոնական տեղեկագրում, որի դեպքում է գնման գործընթացը համարվում սկսված:

Հակառակ դեպքում ՀՀ կառավարության 04.05.2017թ.-ի թիվ 526-Ն որոշմամբ հաստատված «Գնումների գործընթացի կազմակերպման» կարգի դրույթները չեն ծառայի իրենց նպատակին, այլակերպ մեկնաբանման դեպքում կհանգեցնեն որևէ ողջամիտ իրավական փաստարկով չհիմնավորվող մեկնաբանության՝ հաշվի չառնելով այն ընդունող մարմնի նպատակը, նորմում պարունակվող բառերի և արտահայտությունների տառացի նշանակությունը, «Գնումների մասին» ՀՀ օրենքի՝ **օրենքի նպատակին, սկզբունքներին և գործողության ոլորտին** նվիրված 3-րդ հոդվածի կարգավորման ընդհանուր համատեքստը, ինչի արդյունքում կայացված ցանկացած որոշմամբ կխախտվեն գնումների գործընթացի տնտեսող, արդյունավետ և օգտավետ իրականացման սկզբունքներն ու գնումների մասին ՀՀ օրենսդրության նպատակը:

Օրենքի 15-րդ հոդվածի 6-րդ մասի համաձայն՝ մինչև ֆինանսական միջոցներ նախատեսվելը սույն օրենքով սահմանված կարգով կարող է կնքվել պայմանագիր՝



պայմանով, որ դրա շրջանակներում գնում կարող է կատարվել անհրաժեշտ ֆինանսական միջոցներ նախատեսվելու դեպքում: Սույն մասի համաձայն կնքված պայմանագիրը լուծվում է, եթե այն կնքելու օրվան հաջորդող վեց ամսվա ընթացքում պայմանագրի կատարման համար ֆինանսական միջոցներ չեն նախատեսվել: Սույն մասը կարող է կիրառվել, եթե՝

1) պատվիրատուն չի կարողանում նախապես կանխատեսել (հաշվարկել) գնումների համար անհրաժեշտ ֆինանսական միջոցների չափը.

2) ապրանքի մատակարարումը, աշխատանքի կատարումը կամ ծառայության մատուցումը պետք է սկսվի տվյալ գնման համար ֆինանսական միջոցներ նախատեսվելու պահից հաշված այնպիսի ժամկետում, որի ընթացքում գնման մրցակցային որևէ ձևի կիրառումը ժամկետի առումով անհնար է:

Կարգի 18-րդ կետի համաձայն՝ Օրենքի 15-րդ հոդվածի 6-րդ մասի համաձայն գնում կատարվելու դեպքում գնումների պլանում գնման առարկան ներառվում է առանց գնման ընդհանուր գումարի նշման՝ ֆինանսական միջոցներ նախատեսվելուց հետո գնման պլանում համապատասխան լրացում կատարելու պայմանով:

Վերոնշյալ դրոյթների վերլուծության արդյունքում, Բողոքներ քննող անձը հանգում է այն հետևության, որ Օրենքի 15-րդ հոդվածի 6-րդ մասի համաձայն՝ մինչև ֆինանսական միջոցներ նախատեսվելը, գնման գործընթաց սկսելու համար գնման առարկան պետք է ներառվի գնումների պլանում՝ առանց գնման ընդհանուր գումարի նշման: Այս կարգով է միայն հնարավոր փաստել և հաստատված համարել գնման գործընթացի կազմակերպման իրավական հիմքի՝ գնումների պլանի առկա լինելու հանգամանքը:

Սույն գործում առկա փաստերի համաձայն՝ «Ինֆեկցիոն հիվանդությունների ազգային կենտրոն» ՓԲԸ-ի կողմից էնդոսկոպ համակարգի ձեռքբերման նպատակով 16.12.2020թ.-ին հայտարարված «ԻՀԱԿ-ՀՄԱԱՊԶԲ-ԳԼԲՍ-20/15» ծածկագրով մեկ անձից գնում կատարելու ընթացակարգի հրավերի թիվ 1 հավելվածով նախատեսված տեխնիկական բնութագիր-գնման ժամանակացույցի համաձայն՝ 1-ին չափաբաժնի մասով գնման առարկա է հանդիսանում 1 հատ էնդոսկոպ համակարգի կոմպլեկտ /վիդեոգաստրոկոլոնոբրոնխոսկոպիկ համակարգի կոմպլեկտ/ սարքը և որպես գնումների պլանով նախատեսված միջանցիկ ծածկագիր՝ ԳՄԱ դասակարգման (CPV) կոդ նշվել է՝ 33141174:

[www.armeps.am/PPCM/](http://www.armeps.am/PPCM/) կայքում առկա «Ինֆեկցիոն հիվանդությունների ազգային կենտրոն» ՓԲԸ-ի 23.11.2020թ.-ին կատարված 2020 թվականի գնումների պլանի փոփոխության համաձայն՝ Ընթացակարգի 1-ին չափաբաժնով սահմանված ԳՄԱ

դասակարգման (CPV) կոդով (33141174/501, 33141174/502, 33141174/503) ապրանքի համար նախատեսված քանակը նշվել է՝ 0, գումարը՝ 0:

[www.gnumner.am](http://www.gnumner.am) կայքում առկա տվյալների համաձայն՝ «Ինֆեկցիոն հիվանդությունների ազգային կենտրոն» ՓԲԸ-ի կողմից «ԻՀԱԿ-ՀՄԱԱՊՁԲ-ԳԼԲՍ-20/15» ծածկագրով հայտարարված մեկ անձից գնում կատարելու ընթացակարգով ձեռքբերվելիք գնման առարկան, սահմանված ԳՄԱ դասակարգման (CPV) կոդով, ներառվել է 2020թ.-ի գնումների պլանում:

Գնումների պլանի համաձայն՝ գնման առարկա է հանդիսանում 1 հատ էնդոսկոպ համակարգի կոմպլեկտ /վիդեոգաստրոկոլոնոբրոնխոսկոպիկ համակարգի կոմպլեկտ/ սարքը, գումարը նշված է՝ 0 և որպես գնումների պլանով նախատեսված միջանցիկ ծածկագիր՝ ԳՄԱ դասակարգման (CPV) կոդ նշվել է 33141174:

Գնումների պլանը Պատվիրատուի կողմից հաստատվել է 14.12.2020թ.-ին և հրապարակվել կայքում 16.12.2020թ.-ին:

Վերոհիշյալ իրավական նորմերի և փաստական հանգամանքների հիման վրա, Բողոքներ քննող անձը փաստում է, որ «Ինֆեկցիոն հիվանդությունների ազգային կենտրոն» ՓԲԸ-ի կողմից «ԻՀԱԿ-ՀՄԱԱՊՁԲ-ԳԼԲՍ-20/15» ծածկագրով հայտարարված մեկ անձից գնում կատարելու ընթացակարգը կազմակերպվել է գնումների պլանի՝ իրավական հիմքի առկայության պայմաններում: Սույն դեպքում, Կարգի 16-րդ կետի իմաստով, գնումների պլանը հաստատված և հրապարակված է՝ սահմանված պահանջներին համապատասխան, իսկ գնման առարկան՝ համապատասխան քանակների նշմամբ ներառված է գնումների պլանում: Ինչպես նաև թե պլանով և թե հրավերով Ընթացակարգի 1-ին չափաբաժնով սահմանված ԳՄԱ դասակարգման (CPV) կոդով ապրանքը նշվել է էնդոսկոպ համակարգի կոմպլեկտ /վիդեոգաստրոկոլոնոբրոնխոսկոպիկ համակարգի կոմպլեկտ/ սարքը, որի համար նախատեսված քանակը նշվել է 1, գումարը՝ 0, միջանցիկ ծածկագիր՝ ԳՄԱ դասակարգման (CPV) կոդ՝ 33141174:

Ինչպես նաև Բողոքներ քննող անձը հարկ է համարում փաստել, որ Հանձնաժողովը, ընթացակարգը հայտարարելով Օրենքի 15-րդ հոդվածի 6-րդ մասի հիման վրա, գործել է իրավաչափ, քանի որ Ընթացակարգի 1-ին չափաբաժնի՝ 1 հատ էնդոսկոպ համակարգի կոմպլեկտ /վիդեոգաստրոկոլոնոբրոնխոսկոպիկ համակարգի կոմպլեկտ/ սարքի համար 14.12.2020թ.-ին հաստատված և [www.gnumner.am](http://www.gnumner.am) կայքում 16.12.2020թ.-ին հրապարակված գնումների պլանով (փոփոխություններով) նախատեսված ԳՄԱ դասակարգման (CPV) միջանցիկ ծածկագրով՝ 33141174, նախատեսված չեն ֆինանսական միջոցներ, որպիսի

պայմաններում օրենքի վերոնշյալ հոդվածի կիրառումը չի հակասում գնումների մասին ՀՀ օրենսդրությամբ սահմանված պահանջներին:

Այսպիսով, վերոհիշյալ փաստական հանգամանքների և իրավական նորմերի լույսի ներքո, դրանց համակարգված վերլուծության արդյունքում Բողոքներ քննող անձը հանգում է այն եզրակացության, որ «Ինֆեկցիոն հիվանդությունների ազգային կենտրոն» ՓԲԸ-ի կողմից հայտարարված «ԻՀԱԿ-ՀՄԱԱՊՁԲ-ԳԼԲՍ-20/15» ծածկագրով մեկ անձից գնում կատարելու ընթացակարգը կազմակերպվել և գնման գործընթացը սկսվել է իրավական հիմքի առկայությամբ՝ գնման առարկան ներառվել է գնումների պլանում, որն էլ հաստատված է եղել Պատվիրատու կողմից 14.12.2020թ.-ին՝ մինչև գնման գործընթաց սկսելը՝ 16.12.2020թ.-ը, ինչի արդյունքում Պատվիրատուի կողմից թույլ չի տրվել Օրենքի 15-րդ հոդվածի 3-րդ մասով, ինչպես նաև Կարգի 16-րդ և 17-րդ կետերով սահմանված պահանջների խախտում, որպիսի պայմաններում «Մարգ Ֆարմացիա» ՍՊԸ-ի ներկայացրած բողոքն անհիմն է և ենթակա մերժման:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների հետ կապված բողոքներ քննող անձը,

### **Ո Ր Ո Շ Ե Ց**

«Մարգ Ֆարմացիա» ՍՊԸ-ի կողմից 22.12.2020թ.-ին ներկայացված ԳԲԲԱ-ԼՕ-2020/128 ծածկագրով բողոքը մերժել ամբողջությամբ՝ անհիմն լինելու պատճառաբանությամբ:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**ՀՀ ԳՆՈՒՄՆԵՐԻ ՀԵՏ ԿԱՊԱԾ  
ԲՈՂՈՔՆԵՐ ՔՆՆՈՂ ԱՆԶ՝**

**ԼԵՎՈՆ ՕՇԱՆՅԱՆ**

